



Gianni Pittella: Podjela BiH je bila hitno, a ne dugoročno rješenje / DŽENAN KRIJEŠTORAC

Kaznite političare na izborima

Ako liderstvo u pristupanju Evropskoj uniji izostane, rješenje je kazna u oktobru, ističe Gianni Pittella

Razgovarala: **ANJA GRBOVAC-ZVIJERAC**

Predsjedavajući Kluba zastupnika Progresivnog saveza socijalista i demokrata u Evropskom parlamentu Gianni Pittella boravio je sa delegacijom u BiH. Delegacija EP-a sastala se sa predsjedavajućim Predsjedništva BiH Bakrom Izetbegovićem, a jučer i sa predsjednikom RS-a Miloradom Dodikom.

Slažete li se sa ocjenama da BiH već dugo godina boluje od tri bolesti: nacionalizma, nepotizma i korupcije?

- Ova tri oboljenja nisu ni po čemu nešto što je karakteristično za Bosnu i Hercegovinu, to su bolesti koje možete naći i u regionu, pa i Evropskoj uniji. Ne treba čovjek imati neke iluzije da je BiH po tome specifična. Međutim, ključna stvar jeste da kroz politiku i prave političare razvijate antitijela kako bi se borili protiv ovakvih bolesti.

Globalni problem

U onom momentu kada postane članica EU, imate na raspolaganju odgovarajuće instrumente i mehanizme koji vam daju mogućnost da se borite ili ublažavate simptome tih bolesti.

BiH, kao i mnoge zemlje, ima problem s terorizmom. Jeste li se osjećali sigurno kad ste krenuli u BiH?

- Prilikom boravka ovdje zaista nisam imao ni u jednom trenutku impresiju da sam na bilo koji način ugrožen. Međutim, činjenica da ovdje postoje radikalisti borci na stranim ratištima opet nije specifičnost BiH. Riječ je o globalnom problemu koji smo i sami osjetili terorističkim napadima u Bruxellesu i Parizu. Budući da je riječ o globalnom problemu, potreban je globalni recept i odgovor

koji, između ostalog, uključuje odgovarajuće obrazovanje i zapošljavanje. U jednoj zemlji kao što je Bosna i Hercegovina, gdje imate stopu nezaposlenosti među mladima veću od 60 posto i niske obrazovne kvalifikacije, postaje jako jednostavno za ovu propagandu da nađe svoje uporište i ukorijeni se među ljudima.

Naša je zemlja predala aplikaciju za članstvo u EU, a nijedna članica nije još tražila da se o njoj raspravlja. Ispunjava li BiH uvjete koji su joj postavljeni?

- Mi kao Evropski parlament, a u konačnici EU je vrlo jasno definisala tri zahtjeva koja BiH treba da ostvari, kako bi joj se u narednim fazama ponudio status kandidata, a ti uslovi podrazumijevaju defini-

Trebate na kraju staviti tačku na cijelo poglavlje prošlosti ove zemlje i otvoriti novo - budućnosti. To je jedini izlaz za Bosnu i Hercegovinu

ranje interne koordinacije unutar zemlje, tu je provedba Reformske agende i objavljivanje rezultata popisa. Naravno, ukoliko ova tri zahtjeva budu ispunjena bez odlaganja, postoji mogućnost da u julu na svojoj sjednici Evropsko vijeće bude razmatralo aplikaciju BiH za članstvo u EU. Za ovakve korake potrebno je opredjeljenje, snažna volja i

mudrost političkih struktura, jedno pravo liderstvo koje će se pokazati na ovom primjeru.

Državni nivo

Međutim, ako takvo liderstvo izostane, vjerujem da ti političari trebaju biti sankcionirani od svojih glasača na izborima. Moja impresija govori da ogroman broj građana zapravo zagovara priključivanje Evropskoj uniji, a nasuprot tome imate političke lidere koji preferiraju status quo.

Političke stranke u BiH već deceniju pokušavaju dogovoriti mehanizam koordinacije. Italija, odakle dolazite, ima 20 pokrajina i 109 regija. Imate li recept za nas?

- Mi imamo vrlo jasnu podjelu nadležnosti i ovlaštenja. U konačnici, što se tiče svih odnosa sa EU, to se odvija isključivo na nacionalnoj, državnoj razini preko premijera i ministra za evropske poslove. Govoreći u političkom smislu, postoji vrlo jasna podjela.

Evropski sud za ljudska prava donio je prošle sedmice još jednu presudu u kojoj je naveo da je Ustav BiH diskriminatorni. Je li BiH, kao što je ocijenio Vaš kolega iz Njemačke Josip Juratović, posljednja rasistička zemlja?

- Odluka Evropskog suda je sasvim utemeljena, međutim, treba imati u vidu da je samo ustavno uređenje BiH takvo, da je radeno na osnovu podjela između tri etničke grupe. Zbog toga je važan cijeli proces pristupanja Evropskoj uniji. Ne sviđa mi se izraz rasistička zemlja, ali ovakva podjela BiH nacionalnim linijama jeste nešto što je bilo dobro kao hitno rješenje, ali dugoročno gledano, nije.